

## Das 3. Cap.

**N**un wollen wir besehen die Tugendt des  
 Luftts bey den andern Elementen. Dann  
 gleich wie die drey Elementen todt seyn ohne  
 das Feuer/ also ist auch dz Feuer todt ohne  
 die Elementa, darauß die vollkommene Weiß-  
 heit Gottes gespühret wirdt/welche nichts ver-  
 gebens geschaffen/ Dann gleich wie das Feu-  
 wer das Leben ist/vnnd lebet im Luftt/also lebet  
 auch der Luftt im Feuer/ das Wasser in der  
 Erden/ die Erde im Wasser/ das Wasser im  
 Luftt/ &c. Das Feuer reiniget den Luftt/der  
 Luftt das Wasser/ das Wasser die Erden/vnd  
 ein jeglichs macht die andere/dz Feuer/gleich  
 der Klarheit seiner Klarheit: Schauwet an/wie  
 im Sommer durch die Krafft der Sonnen/dz  
 Wasser vsichtbarlicher wise auffgezogen/  
 vnd durch den Luftt clarificirt wirdt/ also daß  
 vnter Luftt vnnd Wasser kein vnterscheidt ist/  
 wie wir solches täglich mercken am Wasser/  
 welches/so es in die Sonne gesetzt/wirdt auff-  
 gezogen/vnnd bleibt subtil/ so lange es von der  
 Kälte nit vergrobet wird/denn wie das Feuer  
 alle Ding subtilisirt/also die Kälte/welche des  
 Feuers Gegentheil ist/ vergrobet alles/vnnd  
 druckt das Wasser zusammen/in deme sie jme  
 benimpt die Feuerwärme des Feuers/vnnd